

Sāgaramati-pariprcchā-sūtram

佛說海意菩薩所問淨印法門經卷第十七

西天譯經三藏朝散大夫試鴻臚卿傳梵大師賜紫沙門臣法護等奉 詔譯

爾時世尊說是破魔法門時，一切魔宮皆悉暗暝，六種震動，如佛初坐菩提道場，未成正覺，居菩薩位，爾時眉間放大光明，而諸魔宮亦皆暗暝，同於今日，等無有異。是時諸惡魔眾，見斯廣大變異之相，速疾嚴整於四兵眾，猶如往昔詣菩提場所莊嚴相，今者亦然，領四兵眾，廣三十六由旬，皆悉遍滿，來至世尊大寶莊嚴大集會所，以佛世尊威神力故，而悉不能還復魔宮。又佛神力，魔眾來時，或見餘諸刹土有佛世尊，與不退轉諸菩薩眾，化度眾生，及斷諸有結，證阿羅漢者，或有正見，具足補特伽羅【pudgala--丈夫、有情、眾生】。

爾時世尊告海意菩薩言：海意！汝今見此諸惡魔眾，如是莊嚴來眾會不？海意白佛言：世尊！唯然！已見！佛言：海意！是諸魔眾，至此會中，於我正法欲興難事，而汝今者，當何所為？海意白佛言：世尊！我今以此惡魔之眾，置於他方諸樂莊嚴世界之中。

爾時會中尊者舍利子即白海意菩薩言：善哉！大士！諸樂莊嚴世界，為在何所？其佛法號復何名字？海意菩薩言：尊者舍利子！東方去此佛刹，過十二殑伽沙數等國土，有世界名諸樂莊嚴，其土有佛，號曰摧魔如來、應供、正等正覺，見在說法。以何緣故？而此世界名諸樂莊嚴？尊者！謂彼世界，有諸樂事、諸功德事、諸莊嚴事，若廣宣說彼勝妙事，縱一劫中，說不能盡，以是緣故，其世界名諸樂莊嚴。又其佛號，摧魔如來，應供、正等正覺者，謂彼世尊，初坐菩提道場，居菩薩位，未證一切智時，身放光明，普照諸魔，其光所照，彼魔界中百俱胝魔眾，而一一魔各有千俱胝眷屬，是時諸魔詣菩薩所，欲於菩薩興諸難事，而此菩薩威神力故，其魔不能作諸障難，即時各發希有之心，向彼菩薩歸依頂禮，菩薩即為如應說法，魔聞法已，身心清淨，即發阿耨多羅三藐三菩提心，其後彼佛證道果已，是故立名摧魔如來。又復彼佛，於過去世莊嚴劫中，居菩薩位時，名降伏魔，今此賢劫之中，得菩提已，能令諸魔發菩提心而為承事，其佛但為諸菩薩眾，唯說最上大乘之法，無復二乘之名。尊者！是故我今置此魔眾，往彼諸樂莊嚴世界之中，置於彼已，使諸魔眾不復興於魔之事業，於彼佛刹，與其降伏魔菩薩，同發菩提心已，圓滿菩提分法。爾時諸惡魔眾聞是語已，生大驚怖，身毛悚豎，即欲離彼眾會，以佛威神力故不能去，又不能隱蔽其身而極怖懼，即各向佛歸依頂禮，作是白言：救我！世尊！救我！善逝！無令海意菩薩置我於彼世界之中。

爾時佛告諸魔眾言：汝等諸魔，勿生驚怖，菩薩大士於諸眾生不起嫉害，汝等應當自於海意菩薩之前求忍悔謝，必當為汝善作救護。爾時魔眾即各合掌，向海意菩薩稽首白言：我今悔謝，大士忍可，勿置我於諸樂莊嚴世界之中，如我所作，不復第二往彼眾會。海意菩薩言：諸魔當知，我今於汝無復可忍，何以故？菩薩於一切眾生，究竟常忍，汝等諸魔，今宜往彼諸樂莊嚴世界之中，觀彼世界眾莊嚴事，彼摧魔如來，於汝魔眾無所嫉害。爾時海意菩薩，即舒右臂金色晃耀，安於魔頂而為加持。作如是言：若法真實，此真實語，諸菩薩者，於法無慳，亦無祕吝，以此真實語故，如我所有如是神力，令此魔眾皆悉獲得。海意菩薩作是語已，而諸魔眾即得自在神力具足。爾時此三千大千世界六種震動，而諸魔眾，於此會中隱身不現，於須臾頃，到彼諸樂莊嚴世界之中，皆是海意菩薩加持力故。是時魔眾到彼國已，即詣摧魔如來應供正等正覺所，頭面著地禮佛雙足，右繞七匝，退住一面。爾時彼佛剎中有一菩薩，名降伏魔，見是相已，白其佛言：世尊！今此劣弱尠有威光，狀貌異常，人可惡者，從何所來？其佛答言：善男子！西方去此佛剎，過十二殑伽沙數等世界，有一世界，名曰娑婆，彼佛世尊，號釋迦牟尼如來、應供、正等正覺，今現在彼大寶莊嚴道場，廣大宣說大集會正法；復有十方世界無量阿僧祇出過算數諸大菩薩，皆悉來集，聽受正法，而彼會中有一菩薩，名曰海意，善被不可思議大堅固鎧，而能請問釋迦牟尼如來如是正法，當說法時，有惡魔眾，至彼會中，欲興難事，於是海意菩薩大士，置其魔眾而來至此，為欲化度作成辦故。

爾時降伏魔菩薩白諸魔言：我等今者與汝諸魔，同發阿耨多羅三藐三菩提心，何以故？我昔亦嘗處於魔類，於諸眾生種善根時，而生障難，其後於此如來法中，發阿耨多羅三藐三菩提心，是故今時汝等諸魔，宜應速發阿耨多羅三藐三菩提心。爾時諸魔深心堅固，各發阿耨多羅三藐三菩提心。既發心已，咸作是言：我等已發阿耨多羅三藐三菩提心，永不復作魔之事業。於是降伏魔菩薩即命其魔，同處於彼眾寶莊嚴師子之座，而勸請言，善男子！云何是彼釋迦牟尼如來所說大集會正法，隨汝所樂，今當演說。

爾時諸魔，承海意菩薩威神之力所加持故，尋即處于師子之座，從其口面，及諸毛孔，出清淨音，猶如釋迦牟尼如來所說，大集會正法，如是文字，如是章句，一一宣說，滿足無遺，於其中間，亦無增減。時降伏魔菩薩，於其魔所，得聞如是大集會正法已，生希有心，白彼佛言：世尊！我今欲見娑婆世界及釋迦牟尼如來，又欲見彼海意菩薩并十方世界所來集會諸大菩薩摩訶薩眾。時彼世界摧魔如來，即於眉間放大光明，名曰普現一切色相，是光遍照西方去此十二殑伽沙數等諸佛剎土，乃至娑婆世界，廣大明耀，相續不斷，彼諸樂莊嚴世界諸菩薩眾，皆見釋迦牟尼如來，在於大寶莊嚴道場之中，處百千種色相嚴飾

寶師子座，為十方世界諸來集會大菩薩眾，廣大宣說大集會正法。又復見此娑婆世界，大水盈滿，猶如大海，普觀是中，悉無障礙。又見十方世界所來集會諸大菩薩，各各坐於眾寶莊嚴大蓮花上，聽受正法，其花縱廣一俱盧舍【krośa--十里】，是諸大士見是相已，生歡喜心，適悅慶快，即以妙花，遙向釋迦牟尼如來散擲供養，所散之花，以佛世尊威神力故，悉於釋迦牟尼如來頂上，結成廣大殊妙花蓋。時此佛會一切大眾，見是花蓋於佛頂上乘空而住，生希有心，俱白佛言：世尊！今此花蓋從何所來？佛言：諸仁者！此花蓋者，是彼諸樂莊嚴世界之中菩薩大眾，遙向此會散擲妙花而伸供養。而此眾會，咸白釋迦牟尼佛言：世尊！我等樂欲見彼諸樂莊嚴世界及彼世尊摧魔如來，亦欲見此所往諸魔之眾，并其世界所施作事。

爾時世尊，知其眾會之所樂欲，即告海意菩薩言：善男子！今此眾會，樂見諸樂莊嚴世界，亦欲見彼摧魔如來，汝可現之，使諸大眾咸悉瞻奉。於是海意菩薩，承佛教勅，即時於其足十指間，放十千光明，其光普照東方去此十二殑伽沙數等諸佛刹土，乃至諸樂莊嚴世界，廣大明耀，相續不斷，時此會中一切大眾，悉見諸樂莊嚴世界，及得見彼摧魔如來，又見諸魔在彼佛會，處于法座，廣為大眾說大集會正法。此會大眾見是相已，生希有心，各各從於蓮花座起，遙向摧魔如來合掌頂禮，各以妙花散擲供養，所散之花，以佛世尊威神力故，於彼摧魔如來頂上，結成廣大妙花樓閣。

爾時魔眾，白彼摧魔如來言，世尊！我等今欲還復娑婆世界釋迦牟尼佛所。彼佛告言：諸善男子！汝可還復，今正是時。於是諸魔頭面著地，禮彼佛足，右繞七匝，以海意菩薩威神力故，於彼刹中隱而不現，經須臾頃還於娑婆世界，到已，頭面禮釋迦牟尼佛足，右繞七匝，退住一面，攝心諦意，恭敬歸向。

爾時尊者舍利子告諸魔言：諸仁者！汝等見彼諸樂莊嚴世界不？諸魔答言：我等已見，尊者！彼土希有清淨可愛，是為清淨無垢最上所居，我等見已，皆發阿耨多羅三藐三菩提心。尊者舍利子言：諸仁者！汝等已發阿耨多羅三藐三菩提心，不應復作諸魔事業。魔言：不也！尊者！若有善住深固心者，諸菩薩眾乃能施作諸魔事業，何以故？如諸菩薩善住深固心者，即有力能隨其所應發起魔事，以是緣故，尊者當知，諸有菩薩施作魔事，此說即是佛之事業，非魔事業。

爾時諸魔於此佛刹現神變已，此眾會中，有二萬人發阿耨多羅三藐三菩提心。於魔眾中，復有一萬天子，發阿耨多羅三藐三菩提心，異口同音，作如是言：世尊！我等悉願生彼諸樂莊嚴世界之中，作是語已，於是釋迦牟尼如來即記之 曰：汝等當生彼佛刹中。

爾時海意菩薩復白佛言：世尊！諸佛如來菩提之法，諸魔外道多生障難，惟願世尊威神建立，令此正法久住世間，復於如是甚深經典攝受護持。世尊！若此經典，得佛如來所加持故而不隱沒，受持讀誦廣大流布，令諸魔眾伺不得便。佛告海意菩薩言：海意！我今所建立之正法，若有眾生，欲發精進，種諸善根，為作成熟化度之者，當於如是甚深經典，如法受持，為他演說。

復次，佛告海意菩薩言：汝今諦聽！極善作意！今為汝說，呼召四大天王祕密章句，而此章句，速能召集四大天王，有此正法之處，來為作護，亦當攝護其說法師。爾時世尊，即說陀羅尼曰：

怛地也(二合)他(引)三彌(引)三摩散底薩囉尼娑(引)囉嚩底達泥(引)達那嚩底度度彌(引)度度摩底阿(引)縛哩多(二合)泥(引)阿末里(引)尾末里(引)尾囉[口*爾](引)葛葛哩(引)葛葛尼(引)虎魯虎魯嚩底虎魯散提儻哩伽(二合)灑尼阿(引)嚩地(引)尾耶(二合)引)嚩地(引)末末枯末底摩(引)囉[口*爾]帝(引)尾輪提(引)尾輪馱嚩底彌彌里(引)末努(引)賀囉莎嚩(二合)引)賀(引)

Tadyathā, same sama saṃdhi, saraṇi sāravati, dhane dhanavati, dhu dhu mī dhu dur-maty, ā-vartane a-male vi-male vi-raje, gha gha rī gha ghane, huru huruvati, huru saṃdhe nir-gharṣaṇi, āvadhīt vyāvadhīt mama ku-mati, māra-jite vi-śuddhe, vi-śuddhavati mil milī mano-hara svāhā.

海意！如是祕密章句，速能呼召四大天王來護持此甚深正法，及能攝護其說法師。又此章句，能令法師善說此法，如所作已，諦觀四方，起大慈心，是時四大天王以此祕密章句所呼召故，皆來攝受諸說法者。

爾時四大天王現在此會，即從座起，前詣佛所，合掌頂禮而白佛言：世尊！若有眾生，於此最上甚深正法，真實了知，而能為他如理宣說者，我等四王并諸眷屬，常來營衛護持正法，復當攝護其說法師，令無障難，及無衰惱。

佛說海意菩薩所問淨印法門經卷第十七

佛說海意菩薩所問淨印法門經卷第十八

西天譯經三藏朝散大夫試鴻臚卿傳梵大師賜紫沙門臣法護等奉 詔譯

復次海意！我今為汝宣說呼召帝釋天主祕密章句，而此章句，速能呼召帝釋天主來護正法。爾時世尊，即說陀羅尼曰：

怛地也(二合)他(引)惹曳(引)惹野嚩底阿底曼酷哩(引)悉馱末底戌毘(引)扇底葛哩(引)那(引)禰爾(引)難(引)帝(引)難(引)多末底怛哩葛(二合)哩(引)叉曳(引)叉野(引)目契(引)阿嚩多爾尾嚩多爾波哩嚩多爾波哩砌(引)禰(引)悉蜜哩(三合)底悉蜜哩(三合)底散提阿(引)誡蹉僑(引)尸迦爾哩[口*爾](二合)多阿蘇囉惹煬底禰(引)嚩(引)三摩(引)瑜乞帝(二合引)阿(引)半努(引)達哩摩(二合)怛哩[口*爾](二合)覩(引)囉摩(引)呬莎嚩(二合)悉爹(二合)野曩部(引)多(引)喃(引)啊(引)囉訖叉(二合)達哩摩(二合)左(引)哩喃(引)莎嚩(二合引)賀(引)

Tadyathā, jaye jayavaty, ati-man kure, siddha mati śubhe, śānti-karī nādinī, dānte dānta-mati tarka rī, kṣaye kṣaya ā-mukhe, ā-vartani vi-vartani pari-vartani pari-cchede, smṛti smṛti saṃdhe, ā-gaccha kauśika nir-jita asura jayanti, devā sam-āyukte ā-pannod-dharma tarjito ramāhi, svasty-ayana bhūtānām ā-rakṣa dharma-cārinām svāhā. 【注：svasty-ayana = svasti-ayana】

海意！如是祕密章句，能呼召帝釋天主，有此正法之處，來為作護，及能攝護其說法師，而彼法師，應當以此祕密章句，作持誦已，潔淨身心，依法沐浴，著新淨衣，處師子座，向於東方，散擲妙花，祈求諸佛，願賜攝受，於諸眾生起大悲念，虔想帝釋天主哀愍，前來為我安布聽法之眾，令其嚴肅，復令此陀羅尼文句和合，如是等事現前所作。若彼法師，內心清淨，戒行潔白，即能令其帝釋天主來為攝受，安布眾會，和合文句，善作加護。爾時帝釋天主現在此會，即從座起，前白佛言：如世尊勅！於後末世，若有法師而能受持此正法者，我當往彼為其安布眾會，和合文句，而作加護。又此正法所在之處，為其攝受，令法久住。世尊！又此正法於後末世，我當為彼三十三天諸天子眾，常廣宣說，何以故？今此正法，即是過去未來現在諸佛世尊菩提之法，佛所讚故，又復我於過去未來現在諸佛世尊菩提之法，起尊重已，是故我當說此正法。爾時世尊讚帝釋天主言：善哉！善哉！僑尸迦【kauśika】！汝能作師子吼發如是言，於後末世護持正法，如汝所言，應如是行。又僑尸迦！以此正法攝受力故，能令諸天隨所願求，常得最勝，阿修羅眾威光退失。

復次，海意！我今為汝宣說攝伏諸魔天眾祕密章句，而此章句，速能攝伏諸魔天眾來護正法。爾時世尊，即說陀羅尼曰：

怛地也(二合)他(引)設彌(引)設摩嚩底設彌帝(引)設訖囉(二合)盜酷哩(引)擊酷哩(引)摩(引)囉[口*爾]帝(引)葛囉(引)膩(引)枳(引)踰(引)哩帝(引)惹嚩底烏路灑野(二合)儻尾始瑟吒(二合)儻哩摩(二合)梨(引)摩(引)羅(引)鉢那曳(引)枯枯隸(引)珂拏誡(二合)誡囉(二合)薩誡囉(二合)薩泥(引)烏目契(引)鉢燃(引)目契(引)阿(引)目契(引)設彌多尼薩哩嚩(二合)誡囉(二合)賀滿馱那儻屹哩(二合)係(引)帝薩哩嚩(二合)波囉鉢囉(二合)嚩(引)嚩(引)喃(引)尾目訖帝(二合)摩(引)囉播(引)舍(引)塞多(二合)必(引)陀泥(引)沒馱母捺囉(二合)耨捺伽(二合)帝(引)薩哩嚩(二合)婆賴蘇左哩多鉢哩輪亭夜(二合)尾嚩囉[口*爾](二合)覩(引)薩哩嚩(二合)摩(引)囉葛(引)哩摩(二合)尼(引)莎嚩(二合)賀(引)

Tadyathā, śame śamavati śamite, śakra aṅgule bhaṅgure māra-jite kārāṇe, keyūre tejavati uruṣyani, vi-śiṣṭa nir-male māra-apanaye, ku-kule khaḍ-gha grāsa grasane, u-mukhe parāṅ-mukhe ā-mukhe śamitaṇi, sarva graha bandhana ni-gṛhīte, sarva para-pravādīnāṃ vi-mukte, māra-pāśa asta bhedane, buddha mudrā an-udghāte sarva balaṃ su-carita pari-śudhya vi-varjito sarva māra-kārmaṇe svāhā.

海意！如是祕密章句，能攝伏諸魔天眾，復能消除一切煩惱。彼說法師，以此祕密章句作持誦已，處于法座，普觀眾會悉住道場，廣運無量大慈之心，當於己身起醫王想，法如藥想，於聽法眾起病人想，於佛如來起正士想，法眼不失，起久住想。如是等事，以此祕密章句加持力故，現前施作，廣為一切如應說法，是時周匝百由旬內諸魔天眾，悉不能來作破壞事，設復諸魔來至法會者，亦復不能作諸障難。

爾時諸魔天眾現在此會，即從座起，前白佛言：世尊！我今見此海意菩薩大士，以威神力加持我故，置我於彼諸樂莊嚴世界之中。世尊！我今最初已悉棄捨諸魔事業，是故我等於此正法常當護持，後末世中，若城邑聚落，若僧坊中，有人宣說此正法者，我等往彼，離諸慢心，恭敬尊重，專注聽受。爾時世尊讚諸魔言：善哉！善哉！汝等諸魔，而能尊重如是正法，最先已捨諸魔事業，汝等今於如是法中有所獲得，皆由海意菩薩大士神力所致。復次，海意！我今為汝宣說呼召娑婆世界主大梵天王祕密章句，而此章句，速能呼召大梵天王來法師所，當為作護。爾時世尊，即說陀羅尼曰：

怛地也(二合)他(引)昧怛囉(二合引)哥(引)哩(引)葛魯拏(引)哥(引)哩(引)母禰多(引)哥
 (引)哩(引)烏閉(引)訖叉(二合引)哥(引)哩(引)沒馱(引)哥(引)嚧(引)達哩摩(二合)哥(引)
 嚧(引)僧伽哥(引)嚧(引)蘇訖哩(二合)多尾左曳(引)摩賀(引)尾多(引)泥(引)彌瑟波(二
 合引)邏酤(引)烏(引)囉惹(二合)鉢底庾(二合引)囉儒(二合引)捺誡(二合)彌(引)達哩摩
 (二合)那捺尼薩爹鉢囉(二合)底瑟姪(二合引)那烏波鉢底尾輸提(引)三唧兜(引)鉢設
 野(二合引)彌耶(二合)咩(引)嚧路(引)葛寫野(二合)沒囉(二合)賀摩(二合)地踰(二合)底
 也(二合)地瑟姪(二合)三摩(引)地阿(引)吠(引)舍達哩摩(二合)左囉赧俱嚧薩達哩摩
 (二合)波哩誡囉(二合)撼訖哩(二合)多摩耨播(引)擲野沒馱泥帝哩(二合引)摩咩(引)嚧
 叱捺(引)娑摩(二合)囉多(引)達哩摩(二合)作葛囉(二合)鉢囉(二合)嚧哩多(二合)喃俱
 嚧薩埵尾戍(引)達那鉢囉(二合)底誡囉(二合)賀拏達哩摩(二合)那誡囉播(引)利擔沒
 馱(引)提瑟姪(二合引)那摩(引)尾酤(引)畢多(引)野莎嚧(二合引)賀(引)

Tadyathā, mairā-kārī karuṇā-kārī muditā-kārī upekṣā-kārī, buddha-
 kāre dharma-kāre saṃgha-kāre, su-kṛta vi-jaye mahā-vitāne niṣ-
 pālako, ūrjapaty ūrjod-game dharma-nadaṇi, satya prati-ṣṭhāna upa-
 patti vi-śuddhe, saṃ-chido paśyāmy amīva lokasya, brahma-dyuty
 adhiṣṭha samādhy-āveśa, dharma-caraṇaṃ kuru sad-dharma pari-
 grahaṃ, kṛtam anu-pālaya buddha-netrīm amīva chidā, smarata
 dharma-cakra pra-varaṇaṃ kuru, sattva vi-śodhana prati-grahaṇa,
 dharma-nagara pālitaṃ buddha adhiṣṭhānam a-vikopitāya svāhā.

注：【ūrjapaty ūrjod-game = ūrjapati ūrjod-game】

【brahma-dyuty adhiṣṭha = brahma-dyuti adhiṣṭha】

【samādhy-āveśa = samādhi-āveśa】

海意！如是祕密章句，能呼召大梵天王。其說法師以此祕密章句作持誦已，
 應當依止梵行，住無礙心，隱密諸根，善護諸念，所言決定，於其身業，善令
 清淨，於其語業，真實攝護，善固心慧，善修忍行，善淨戒蘊，善發精進之力，
 善持多聞諦，善觀想，令心調暢，極利慧根，善修正行，善護菩提心，善修慈
 觀，安立大悲，普令眾生畢竟解脫一切苦惱，普令眾生獲得妙樂，其說法師，
 起是心已，當處師子之座，祈求大梵天王，願垂攝受，然後如應為他說法。即
 時大梵天王與諸梵眾，來法師所而為護持。又復海意！其說法師應當覺知，大
 梵天王至法會時，有諸善相，所謂一切眾會咸起慈心，或復眾會諸根無缺，或
 復互相安住菩提法中，或復愛樂法及法師，起尊重想，或離諸染污，或專注一
 心，離散亂意，或復繫念於諸善法，或攝斂諸念，止絕外聞，諦意聽法，或於

法師昔所未曾說，昔未曾聞諸妙法門，聞已能說。若有如是等諸相現時，當知即是大梵天王來至法會。

爾時大梵天王現在此會，即從座起，前白佛言：世尊！在在處處，若復有人宣說如是甚深正法者，我居梵界，雖有無量禪定之樂，悉能棄置，即當往彼說法師所，為作加護。世尊！加護之法，有其八種，何等為八？一者：加護其念，令彼如所聞法而不忘失。二者：加護其慧，令彼於甚深法不相違背。三者：加護其行，令彼於義皆悉解了。四者：加護辯才，令彼斷諸疑惑。五者：加護記說，令彼一切語言音聲聞者皆喜。六者：加護化度之法，令彼超勝一切眾會。七者：加護現法光明，令無暗鈍。八者：加護得出離門，令其依法修證。世尊！我以如是八法，善作加護其說法師，而我等復於法師所，密常營衛，令法久住，諸魔怨諍咸悉除滅，此等皆是如來威神之所建立，令其正法廣大流布。爾時海意菩薩復白佛言：世尊！今此正法，惟願世尊威神建立，使令久住，於佛如來入涅槃後，末世之中，若有深種善根諸眾生等，令得如是甚深經典，受於手中，或安篋笥，展轉流布，令不隱沒。爾時世尊，受海意菩薩伸勸請已，即於眉間放眾色光，其光遍照此三千大千世界，廣大明耀，而此三千大千世界之中，一切藥草樹林砂石如是種類，蒙光照觸，皆悉變成如來形像，所變之像，皆於大寶莊嚴道場之中而為供養；以佛威神所建立故，其所變化如來之像，即時各各異口同音作如是言：世尊釋迦牟尼如來，威神建立此正法故，即彼十方一切如來，亦以威神共所建立，若彼諸佛威神建立故，即彼諸魔不能作其障難。世尊！正使魔眾其數猶如碗伽沙等，威勢堅強，盡其勇力，畢竟不能於此正法而興難事。所以者何？假使大地分裂破壞，一切大海而悉枯涸，諸須彌山碎若微塵，風可繫縛，日月墜地，空現色像，火中得水，水中得火，四大種中各有異性，一切眾生而同一心，虛空與地二事相合，假使若有如是等事，亦不能於佛如來加持力中而有少法可動、可轉。

爾時世尊，即舉右手，置於尊者阿難頂上，而告之言：阿難！汝當受持此之正法，於後末世廣宣流布，令得受持讀誦演說，使佛正法久住世間。

爾時海意菩薩白佛言：世尊！見何義故，乃以如是甚深正法，付囑阿難苾芻？而阿難者，具有限智，此會中有諸大菩薩，念慧深廣，猶如大海，莫知淵際，此諸菩薩不付囑邪？佛言：海意！非彼阿難己之慧力而能受持如是正法，皆由如來威神建立。汝今當知，於後末世，有諸眾生，於阿難所，聽受如是甚深正法，聞已信樂，生大歡喜，發希有心，應作是言：皆是如來不可思議威神建立，聲聞之人，乃能如是受持甚深廣大經典，此皆如來威神加持力故。時眾會中，或有天人作是思念，彼海意菩薩念總持力，豈有間邪？何故世尊，但說阿難多聞第一？

爾時尊者大迦葉知眾有疑，觀察大會，前白佛言：世尊！海意菩薩，念總持力，豈有間邪？何故世尊，但說阿難，多聞第一？佛言：迦葉！假使殑伽沙數等佛刹土中，攝聚眾生皆悉遍滿，於汝意云何，彼眾生界寧為多不？迦葉白佛言：甚多！世尊！甚多！善逝！佛言：迦葉！正使如是諸眾生等，無前無後，一時皆得人身，一一皆具念總持力，悉與尊者阿難等無有異，若以如上諸眾生等念總持力，比海意菩薩念總持力，百分不及一，乃至烏波尼殺曇分【upaniṣadam】亦不及一。迦葉！此海意菩薩，能以十方諸佛世尊所說之法，皆悉任持而無障礙，非於一佛二佛所說之法而無障礙。譬如天雨入大海中，非但容受一滯二滯而無障礙，乃至容受一切雨滴悉無障礙，而彼大海不增不減；海意菩薩亦復如是，非於一佛二佛所說之法而無障礙，悉能任持諸佛世尊所說之法而無障礙，而是菩薩念總持力亦無增減。說是法時，會中有八千眾生，發阿耨多羅三藐三菩提心，咸作是言：我等當願各得念總持力，如海意菩薩。

爾時會中諸天及人，各以妙花向佛世尊，及海意菩薩，散擲供養。於是會中有一菩薩，名蓮花莊嚴，前白佛言：世尊！若善男子、善女人，於此甚深法門，聞已信解，受持讀誦，如理伺察，依法修行者，是人得幾數福？

爾時世尊，即說伽他，答蓮花莊嚴菩薩曰：

正使大千世界中	遍滿真金用施佛	聞是法藏信解時	此福比前為最勝
正使十千世界中	滿中珍寶施如來	若能持讀此深經	其福比前不可數
又若十千世界中	滿中珍寶廣行施	若能宣說此深經	其福勝前不可數
正使千俱胝刹土	廣積珍寶滿其中	普施諸佛世間尊	修行此法勝於彼
十方殑伽沙數量	寶嚴佛刹施如來	此法真實修學時	其福比前不可數
四種法具無邊福	佛亦不能說邊際	發菩提心并護法	起大悲及修法行
四種法具無量福	智者聞已不生疑	虛空界與眾生界	菩提心及諸佛智
我此宣說正法寶	震動十方俱胝刹	放淨光明及雨花	不鼓自鳴百種樂
一切菩薩大智士	發最勝心伸偈讚	聞此所說妙法門	各得善利無虛果
從我得聞如是法	眾生普獲諸善利	皆由如來所護持	令菩提心無忘失
千俱胝數十方佛	各各合掌而頂禮	稱讚德海大聖尊	善住加持釋師子
天龍修羅緊那羅	乾闥婆及夜叉等	梵王帝釋護世天	各處空中作是語
願釋師子久住世	最上正法無減沒	勇猛菩薩聖眾尊	護持如是深妙法
有受持此法眼者	我等當往現其身	於彼尊重及策勤	密護令其無衰惱

爾時世尊告海意菩薩言：海意！今此正法，是大法眼、是妙法印、是勝法幢、決擇諸法、分別諸法，而彼過去未來現在諸佛世尊，皆說是法。海意！我先已說，汝等應當尊重恭敬，志誠堅固如理修行。

佛說此經已，海意菩薩等諸大菩薩摩訶薩眾，及諸世間天、人、阿修羅、乾闥婆等，一切大會，聞佛所說，皆大歡喜，信受奉行。

佛說海意菩薩所問淨印法門經卷第十八

【經文資訊】大正新脩大藏經第 13 冊 No. 0400 佛說海意菩薩所問淨印法門經

【版本記錄】CBETA 電子佛典 Rev. 1.19 (Big5)，完成日期：2006/05/19

【編輯說明】本資料庫由中華電子佛典協會（CBETA）依大正新脩大藏經所編輯

【原始資料】蕭鎮國大德提供，維習安大德提供之高麗藏 CD 經文，北美某大德提供

【其他事項】本資料庫可自由免費流通，詳細內容請參閱【中華電子佛典協會版權宣告】

(Transliterated on 9/1/2011 from volume 13th serial No. 400 of the Taisho Tripitaka by Mr. Chua Boon Tuan (蔡文端) of Rawang Buddhist Association (萬撓佛教會). 8, Jalan Maxwell, 48000 Rawang, Selangor, West Malaysia.)

Residence Tel : 603-60918722 [Monday to Sunday after 10.30 a.m.]

Handphone : 6016-6795961. E-mail : chuaboontuan@hotmail.com

Revised again on 29/1/2014.